

Fabrika cementa Lukavac pustila u rad novu proizvodnu liniju

# Najveća i najmodernija fabrika

Nekad najveći zagađivač u Lukavcu, sada je prava „zelena fabrika“

Kurt Asamer, vlasnik, Izet Imamović predsjednik Upravnog odbora i Karol Podhara član Upravnog odbora, te Klaus Fodinger, član Uprave Fabrike cementa Lukavac (FCL), juče su, povodom dana fabrike, pustili u rad novu proizvodnu liniju.

Prilikom starta nove linije, pomenuti menadžeri su se obratili novinarima. Kazali su da je u novu liniju investirano 80 miliona maraka. To je najveća privatna investicija u BiH 2008. godine. Izgradnja je trajala 15 mjeseci i okončana je na vrijeme. Sa novom linijom proizvodnja cementa biće udvostručena, umjesto jedne, proizvođače 2.000 tona cementa, a godišnje će proizvoditi 600.000 tona klinkera. Sa novom linijom FCL je postala najveći proizvođač u BiH i jedna od najmodernijih u Evropi.

Od kupovine FCL, prije osam godina, Asamer grupa iz Austrije je dosad investirala oko 110 miliona eura.

„Prilikom privatizacije zacrtali smo tri cilja - da proizvodimo dovoljno cementa, sačuvamo radna mjesta i zaštitimo okoliš. Sva tri cilja smo sada ispunili“, rekao je



Imamović, Asamer i Podhara na press konferenciji

Kurt Asamer, suvlasnik i predsjednik Nadzornog odbora FCL.

Izet Imamović je ustvrdio da je tvornica toliko čista, da je se može smjestiti u centar bilo kojeg grada. Instaliranjem nove linije u emisioni sistem su ugrađena 33 tzv. „vrećasta filtera“, koji otprašuju samo 10 mq po metru kubnom, što je pet puta manje od dozvoljenih zagađenja u Europskoj uniji. Sada je ovo „zelena fabrika“.

U novu liniju ugrađeno je 5.700 tona čelika i opreme, od

čega su domaće firme proizvele i ugradile 3.900 tona. U izgradnji nove linije radilo je 66 BH firmi, koje su inkasirale 25 miliona maraka.

Kurt Asamer je ustvrdio da recesija neće uticati na poziciju FCL i na obim proizvodnje, jer je ovo kapacitet koji je projektiran da radi tri decenije, a ne par godina. Karol Podhara je ustvrdio da je kompanija Asamer kupila kamenolom u Doboju radi sigurnosti u dobavljanju sirovina, jer je Kamenolom Vijenac, koji daje sirovinu i za Fabriku

sode, prilično nesiguran dobavljač. Oni su zainteresirani za kupovinu i rekonstrukciju Vijenca i sada su u fazi proučavanja dokumentacije ovog preduzeća.

Fabrika cementa Lukavac, kao sirovinu za proizvodnju cementa koristi pepeo iz tuzlanske Termoelektrane, što je još jedan pozitivan ekološki detalj, jer bi se pepeo sa odlagališta širio atmosferom. Puštanjem u rad nove linije, FCL uopće ne zagađuje okoliš u Lukavcu.

V. JAHIĆ